

La veneraziun dil ss. Cor da Jesus

Il Bab celestial ha dau a nus siu Fegl cun in cor plein carezia per tuts carstgauns.

Denter ils biars simbols da nossa religiun, s'auda era il cor, spezialmein il cor da Jesus.

La veneraziun dil ss. Cor da Jesus ei in impurtont aspect ella veta spirtala dalla baselgia catolica. La gronda carezia da Jesus Cristus vegn tras il simbol da siu cor venerada. Quei fideivel patratg vegn ord igl evangeli tenor s. Gion (Gion 19,34 e 7,37 f.). Vid la crusch arva in schuldau cun ina lontscha il cor da Jesus, e saung ed aua cuora ora, sco la fontauna dils sacraments e dalla baselgia. Aschia ei scret ella prefaziun dalla fiasta dil ss. Cor da Jesus:


„Il saung e l'aua da sia costa aviarta fortificheschan e frestgentan Tia baselgia, pertgei en quels segns das Ti ad ella l'eucaristia ed il batten: Quella fontauna cala mai da regalar Tia veta als cartents cheu sin tiara.“

Tier la veneraziun dil ss. Cor vala ei buc per in organ dil tgierp, mobein per il cor sco simbol d'origin dalla carezia ed aschia digl intern dils carstgauns. La carezia inflamada da Cristus, il Salvader, vegn mussada cheutras aschia.

La baselgia "nova" (erregida 1903/04) da Falera ei era dedicata al ss. Cor da Jesus.

Possi la carezia divina inflamar ils cors da tuts cristians!

Vies plevon sur Peter



Fin digl onn da scola...

Ils 25 da zercladur 2010 eis ei puspei schi lunsch, igl onn da scola va alla fin. Per tut las custeivladads che nus havein retschert, vulein nus engraziar al Segner cun in survetsch divin.

Bunamein tut las finiziuns ella veta han in egl che ri ed in egl che bragia. Tut il bi e tut il mender vulein nus surdar al Diu tutpussent, ch'el muossi a nus adina la dretga via e regali a nus il dretg plaid.

Tuts che han finiu il temps en scola da Laax ni a Falera giavischein nus tut il bien per lur proxima via. Bia success e la benedicziun dil Segner accumpogni vus.

..... e las vacanzas

Tgi che sa passentar in per dis ni jamnas vacanzas, seigien benedidas regurdientschas schenghegiadas. Era a quels che astgan passentar in ruasseivel temps da serevegnir en nossa cuntrada, giavischein nus ina buna e plascheivla recreaziun.

Sur Peter pren sias vacanzas dils 26 da zercladur tochen ils 9 da fenadur 2010.

Pelegrinadi a Ziteil

Preavis: Sonda, ils 21 d'uost 2010 pelegrinein nus tier Nossadunna da Ziteil. Reservei il datum. Ulteriuras informaziuns suondan egl fegl parochial digl uost.



Informaziuns per Laax

Communiun dils malsauns:

Mesjamna, ils 09-06-2010 suentermiezdi

Devoziun dallas mummas e lur affons en baselgia

Mira sut informaziuns per Falera. →

Cordiala gratulaziun a nossas giubilaras

Igl 1. da zercladur 2010 festivescha *Hilde König-Hauser* siu 85-avel natalezi.

Ils 12 da zercladur 2010 astga *Triestina Coray-Dami* festivar siu 90-avel anniversari.

Nus gratulein cordialmein allas giubilaras e giavischein la benedicziun da Diu, buna sanadad, bia plaschers el mintgadi ed in legreivel di da fiasta.

Gratulaziun e buns giavischs per nozzas

Ils 12 da zercladur 2010 festiveschan *Sabrina Pohle* e *Rinaldo Camathias* lur nozzas. Nus gratulein als nozzadurs e giavischein bia cletg, ventira ed igl accumpignament da Diu atras la veta matrimoniala.

Fiasta dil s. Batten

Dumengia, ils 20 da zercladur 2010 retscheiva *Lorin*, feagl da Beat e Véronique Casanova il sogn sacrament dil Batten.

Nus beneventein il niev commember da nossa Baselgia e giavischein ad el la benedicziun da Diu ed il sustegn dalla cuminonza cartenta.

Viadi dils seniors

Mesjamna, ils 16 da zercladur 2010 envida l'Uniun da dunnas tuts seniors a lur viadi. Nus giavischein a tuts in legreivel di en buna cumpignia.

Renovaziun dils piertis santeri

Las lavurs da renovaziun dils 2 piertis santeri vegnan exequidas suenter la fiasta da Sontgilcrest.


Informaziuns per Falera

Communiun dils malsauns:

Gievgia, ils 10-06-2010 suentermiezdi

Gievgia, ils 24-06-2010 suentermiezdi

Devoziun dallas mummas e lur affons en baselgia



La barca dil Noah: Tier quella fascinonta historia dalla Bibla, ein tuttas mummas e lur affons cordialmein beinvegnidas.

Ella „barca“ ha ei massa plaz per tuts!

Falera: Mardis, ils 15-6-2010, 16.00h

Laax: Mesjamna, ils 16-6-2010, 16.00h.

Fiasta dil ss. Cor da Jesus

Venderdis, ils 11 da zercladur 2010, allas 19.30h astgein nus benedir duront la s. Messa festiva la statua restaurada dil ss. Cor da Jesus.

La baselgia "nova" (erregida 1903/04) da Falera ei era dedicata al ss. Cor da Jesus. Quella statua ei stada ils davos 40 onns en ina scaffa. Il giavisch ei adina puspei staus, da dar a quella statua in dueivel plaz en "sia" baselgia.

Ussa eis ei schi lunsch, la statua restaurada vegn tschentada en baselgia a caschun dalla fiasta dil ss. Cor da Jesus, ils 11 da zercladur 2010.

Possi la carezia divina inflamar tut nos cors.